

(վարչական տույժ նշանակելու վերաբերյալ)

«17» ապրիլի 2023թ.

ք. Վանաձոր

Հայաստանի Հանրապետության պետական եկամուտների կոմիտեի Արևելյան մաքսատուն-վարչության պետ՝ Հայկ Միրզոյանս, քննելով քաղաքացի Աշոտ Միշայի Ալեքսանյանի (քաղաքացիություն՝ ՀՀ, անձնագիր՝ AT0399373, ծնված՝ 23.04.1989թ., հասցեն՝ 0018, ՀՀ ք. Երևան, Շենքգավիթ, Ներքին Չարբախ., 3-րդ փ., տուն 28) կողմից մաքսային կանոնների խախտման վերաբերյալ գործը,

Պ Ա Ր Զ Ե Ց Ի

1. Գործի նկարագրությունը:

Քաղաքացի Աշոտ Ալեքսանյանի կողմից 07.09.2022թ. Բագրատաշենի մաքսային կետ-բաժնով 15 օր ժամկետով «Տրանսպորտային միջոցի մաքսային հայտարարագրով», ժամանակավոր ՀՀ է ներմուծվել «Ford Tranzit» մակիշի VIN- WF00XXXTTFX6J72761 նույնականացման համարով, MA222XV պետհամարանիշով, 2006թ. արտադրության տրանսպորտային միջոց, որի ներմուծման ժամկետը սահմանվել է մինչև 22.09.2022թ., սակայն մինչ այդ ժամկետի ավարտը վերոնշյալ տրանսպորտային միջոցը չի արտահանվել ՀՀ տարածքից, որի արդյունքում խախտվել է հետադարձ արտահանման պարտավորությունը:

2. Սույն վարչական գործի քննության համար նշանակություն ունեցող փաստեր:

1. 07.09.2022թ.-ին ՀՀ է ներմուծվել «Ford Tranzit» մակիշի VIN- WF00XXXTTFX6J72761 նույնականացման համարով, MA222XV պետհամարանիշով, 2006թ. արտադրության տրանսպորտային միջոց:

2. ՀՀ ՊԵԿ Ներքին անվտանգության վարչությունից ստացված սահմանահատումների պատմություն:
3. 07.09.2022թ.-ին Հայաստանի Հանրապետություն ժամանակավոր ներմուծված «Ford Transit» մակիշի VIN- WF00XXXTTFX6J72761 նույնականացման համարով, MA222XV պետհամարանիշով, 2006թ. արտադրության տրանսպորտային միջոցի՝ խախտման օրվա դրությամբ «Ներքին սպառման համար բացթողում» մաքսային ընթացակարգով հայտարարագրման դեպքում՝ միասնական դրույքաչափերով գանձվող մաքսատուրքերը, հարկերը կկազմեն՝ ներմուծման մաքսատուրք՝ 990,970 ՀՀ դրամ, ավելացված արժեքի հարկ՝ 521,481 ՀՀ դրամ և բնապահպանական հարկ՝ 323,647 ՀՀ դրամ:
4. 05.03.2023 թվականին Աշոտ Ալեքսանյանի նկատմամբ կազմված մաքսային կանոնների խախտման վերաբերյալ արձանագրություն: 2023 թվականի մարտի 31-ին ժամը 11:00-ին նշանակված վարչական գործի վարույթին և 2023 թվականի ապրիլի 5-ին ժամը 11:00-ին գործի քննությանը մասնակցելու նպատակով վերջինիս հասցեին ուղարկվել է ծանուցագիր, սակայն ծրարը վերադարձել է «Չպահանջված նշագրմամբ»: Վարչական գործի լուումները և գործի քննությունը տեղափոխվել և նշանակվել է 2023թ. ապրիլի 17-ին ժամը 11:00-ին և 2023թ. ապրիլի 21-ին ժամը 17:00-ին: Գործի քննությունը վերջինիս խնդրանքով տեղափոխվել և նշանակվել է 2023թ. ապրիլի 17-ին ժամը 11:30-ին:

3. Պատասխանողի դիրքորոշումը

05.03.2023 թվականին Աշոտ Ալեքսանյանը դիմել է ՀՀ ՊԵԿ ԱՄՎ Բազրատաշենի մաքսային կետ-բաժնի պետին հայտնելով, որ 2022թ.-ին սեպտեմբերի 7-ին, 15 օր ժամկետով ՀՀ է ներմուծել MA222XV պետհամարանիշով «Ford Transit» մակիշի տրանսպորտային միջոց: Մեքենայի անսարքության պատճառով այն սահմանված ժամկետում չի կարողացել արտահանել ՀՀ-ից, որի պատճառով կազմվել է մաքսային կանոնների խախտման վերաբերյալ արձանագրություն, որի հետ

վերջինս համաձայն է: Խնդրել է թույլատրել շահագործել իրեն պատկանող տրանսպորտային միջոցը մինչև վարչական վարույթի ավարտը:

4. Սույն գործի փաստական և իրավական հիմնավորումները, վարչական մարմնի եզրահանգումները:

«Եվրասիական տնտեսական միության մաքսային օրենսգրքի մասին» պայմանագրի 274-րդ հոդվածի 1-ին կետի համաձայն՝ «Ժամանակավոր ներմուծվող միջազգային փոխադրում իրականացնող տրանսպորտային միջոցի՝ Միության մաքսային տարածքում գտնվելու ժամկետը սահմանվում է մաքսային մարմնի կողմից փոխադրողի դիմումի հիման վրա՝ ելնելով այն ժամանակից, որն անհրաժեշտ է միջազգային փոխադրում իրականացնող այդ տրանսպորտային միջոցը Միության մաքսային տարածքից արտահանելու համար՝ փոխադրման այն գործողությունների ավարտից հետո, որոնց կատարման համար այն ներմուծվել էր Միության մաքսային տարածք՝ հաշվի առնելով սույն Օրենսգրքի 144-րդ հոդվածը և սույն հոդվածի 2-րդ կետը»:

Նույն հոդվածի 2-րդ կետով սահմանվում է, որ «Միության մաքսային տարածքում ժամանակավոր ներմուծված միջազգային փոխադրում իրականացնող այն տրանսպորտային միջոցի գտնվելու ժամկետը, որը սույն Օրենսգրքի 275-րդ հոդվածի 5-րդ կետին համապատասխան կարող է օգտագործվել բեռների, ուղևորների և (կամ) ուղեբեռի այն փոխադրման համար, որն սկսվում և ավարտվում է Միության մաքսային տարածքում (սույն գլխում այսուհետ՝ ներքին փոխադրում), սահմանվում է այդ ներքին փոխադրումն իրականացնելու համար անհրաժեշտ ժամանակով, բայց ոչ ավելի, քան ժամանակավոր ներմուծված միջազգային փոխադրում իրականացնող տրանսպորտային միջոցի՝ անդամ պետություններից մեկի տարածքում գտնվելու օրվանից 90 օրացուցային օր»: 4-րդ հոդվածի համաձայն՝ «Մաքսային մարմնի կողմից սույն հոդվածի 1-ին և 2-րդ կետերին համապատասխան սահմանված ժամկետում ժամանակավոր ներմուծված միջազգային փոխադրում իրականացնող տրանսպորտային միջոցը Միության մաքսային տարածքից հետադարձ արտահանման անհնարինության դեպքում փոխադրողի, այն անձանց, որոնց տիրապետմանն են փոխանցվել այդ տրանսպորտային միջոցները՝ սույն Օրենսգրքի 275-

րդ հոդվածի 4-րդ կետի 2-րդ ենթակետի երկրորդից չորրորդ պարբերություններին համապատասխան, այլ շահագրգիռ անձանց պատճառաբանված պահանջով այդ ժամկետը մաքսային մարմնի կողմից երկարաձգվում է Միության մաքսային տարածքից տրանսպորտային միջոցի հետադարձ արտահանման անհնարինության պատճառները վերացնելու համար անհրաժեշտ ժամանակով»:

Օրենսգրքի 278-րդ հոդվածի 2-րդ կետի համաձայն՝ որպես միջազգային փոխադրում իրականացնող տրանսպորտային միջոցների հայտարարատու հանդես է գալիս փոխադրողը:

Նույն հոդվածի 3-րդ կետի համաձայն՝ միջազգային փոխադրում իրականացնող տրանսպորտային միջոցների մաքսային հայտարարագրումն իրականացվում է տրանսպորտային միջոցի հայտարարագրի օգտագործմամբ:

Իրավահարաբերության պահին գործող ՀՀ մաքսային օրենսգրքի 189-րդ հոդվածի 1-ին մասի համաձայն՝ «Մաքսային կանոնների խախտում է համարվում անձի կողմից կատարված անօրինական գործողությունը կամ անգործությունն, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն»:

Նույն հոդվածի 2-րդ մասի համաձայն՝ «Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության»:

Նույն օրենսգրքի 199-րդ հոդվածի 1-ին մասի համաձայն՝ «Հետագա արտահանման պարտավորությամբ Հայաստանի Հանրապետություն ներմուծված ապրանքները և տրանսպորտային միջոցները սահմանված ժամկետում չարտահանելը կամ հետագա ներմուծման պարտավորությամբ արտահանված ապրանքները և տրանսպորտային միջոցները սահմանված ժամկետում Հայաստանի Հանրապետություն չներմուծելը՝

առաջացնում է տուգանքի նշանակում՝ խախտման օրվա դրությամբ այդ ապրանքների և տրանսպորտային միջոցների համար «ներմուծում՝ ազատ շրջանառության համար» մաքսային ռեժիմով նախատեսված մաքսային վճարների մեծության 50 տոկոսի չափով, բայց ոչ պակաս, քան 50 հազար դրամ»:

Վարչական իրավախախտումների վերաբերյալ գործերի վարույթը բացառող հանգամանքները սահմանված են Օրենսգրքի 247-րդ հոդվածով:

Ուսումնասիրելով ներկայացված նյութերը, մաքսային մարմինը փաստում է, որ վերջինս սահմանված ժամկետում չի արտահանել իր կողմից ժամանակավոր ՀՀ ներմուծված տրանսպորտային միջոցը կամ չի ձևակերպել այլ մաքսային ընթացակարգով: Սահմանված ժամկետում չարտահանելով վերոնշյալ տրանսպորտային միջոցը կամ չձևակերպելով այլ մաքսային ընթացակարգով նա ցուցաբերել է անգործություն, որի արդյունքում խախտվել է հետադարձ արտահանման պարտավորությունը: Աշոտ Ալեքսանյանի կողմից նշված մեքենայի անսարքության հանգամանքը վերջինիս կողմից չի հիմնավորվել փաստաթղթերով:

Այսպիսով, վարչական մարմինը, քննելով գործում առկա ապացույցները, գտնում է, որ նշված տրանսպորտային միջոցի հետագա արտահանման պարտավորության չկատարման համար Աշոտ Ալեքսանյանի արարքում առկա է իրավահարաբերության պահին գործող ՀՀ մաքսային օրենսգրքի 199-րդ հոդվածով նախատեսված մաքսային կանոնների խախտման հատկանիշներ, ինչը հիմնավորվում է վարչական վարույթի նյութերով:

5. Եզրափակիչ մաս:

Ելնելով վերոգրյալից, ղեկավարվելով իրավահարաբերության պահին գործող ՀՀ «Մաքսային օրենսգրքի» 199-րդ, 206-րդ, 221-րդ հոդվածներով և «Վարչական իրավախախտումների վերաբերյալ» ՀՀ օրենսգրքի 214-րդ, 234-րդ հոդվածներով՝

Ո Ր Ո Շ Ե Ց Ի

1. Իրավահարաբերության ծագման պահին գործող ՀՀ «Մաքսային օրենսգրքի» 199-րդ հոդվածով նախատեսված մաքսային կանոնների խախտում կատարելու համար քաղաքացի Աշոտ Ալեքսանյանին ենթարկել վարչական պատասխանատվության տուգանելով՝ **918,229 ՀՀ դրամի** չափով:
2. Որոշման մասին հայտնել Աշոտ Ալեքսանյանին:
3. Պարզաբանել, որ իրավահարաբերության ծագման պահին գործող ՀՀ մաքսային օրենսգրքի 221-րդ հոդվածի 2-րդ մասի համաձայն որոշումն ուժի մեջ է մտնում այն կայացնելու պահից և ՀՀ մաքսային օրենսգրքի 222-րդ հոդվածի 2-րդ մասի համաձայն որոշումը կարող է բողոքարկվել վերադաս մաքսային մարմին (պաշտոնատար անձին) կայացնելուց հետո՝ 10 օրվա ընթացքում կամ ՀՀ վարչական դատարան՝ ՀՀ վարչական դատավարության օրենսգրքով սահմանված կարգով՝ երկամսյա ժամկետում:

Սույն որոշմամբ նշանակված տուգանքի վճարման հաշվեհամարն է. 900005024055 (ՀՀ պետական բյուջե, կենտրոնական գանձապետարան, Արևելյան մաքսատուն-վարչություն, ԿՈՂ 29):

ԱՐԵՎԵԼՅԱՆ ՄԱՔՍԱՏՈՒՆ-

ՎԱՐՉՈՒԹՅԱՆ ՊԵՏ՝

ՀԱՅԿ ՄԻՐԶՈՅԱՆ